

摘藻堂四庫全書薈要

經部

欽定四庫全書薈要卷一千七百二十七

經部

日講春秋解義卷二

隱公

三年春王二月己巳日有食之

此書日食之始

公羊傳何以書記異也日食則曷為或日或不日或言

朔或不言朔曰某月某日朔日有食之者食正朔也

桓公三年秋七月壬辰朔日有食之是也其或日或不日或失之前或失

之後失之前者朔在前也謂二日食己巳日有食之是也失之後者

朔在後也

謂晦日食莊公十八年三月日有食之是也

穀梁傳

言日不言朔食晦日也其日有食之何也吐者

外壤食者內壤

壤日之輪廓其所吐入者壤在外其所吞食者壤入于內

闕然不

見其壤有食之者也

日既闕損不知壤之所在必有物食之

有內辭也

或外辭也

食者內壤故曰內辭吐者外壤故曰外辭傳無外辭之文者蓋時無外壤也而曰或

外辭者因事以推明義例耳

有食之者內于日也

日食既有兩種之辭今直云有

食之者為壤在于內也

其不言食之者何也

謂經不明言月之食日也

知其

不可知也

聖人慎疑所謂不知為不知是知也

歷法周天之度日行疾月行遲日月一歲凡十二  
會方會則月光都盡而為晦已會則月光復蘇而  
為朔當月朔而日月之會東西同度南北同道則  
月掩日而日為之食精歷算者皆能豫推之是有  
常度矣既有常度可求則災而非異矣然每食必  
書示後世以遇災而懼之意也亦以示後世治歷  
明時之法也日者衆陽之宗為陰所掩王者於此  
修德行政扶陽抑陰以見克謹天戒之意經書曰

食三十六示人君不可忽天象也

三月庚戌天王崩

左傳三年春王三月壬戌平王崩赴以庚戌故書之

公羊傳何以不書葬天子記崩不記葬必其時也至尊無所

屈也諸侯記卒記葬有天子存不得必其時也設有他故葬必

易期曷為或言崩或言薨天子曰崩諸侯曰薨大夫曰

卒士曰不祿等殺其詞以別尊卑

穀梁傳高曰崩厚曰崩尊曰崩天子之崩以尊也其崩

之何也以其在民上故崩之其不名何也大上故不

名也

名者所以相別耳居人之大在民之上故無所名

崩者上墜之形天子之尊四海之內皆當奔喪魯君聞赴不會有慢上之心故志崩不志葬以著其罪

夏四月辛卯尹氏卒

尹左作君

左傳夏君氏卒聲子也不赴于諸侯不反哭于寢不祔

于姑隱不敢從正君之禮故亦不敢備禮于其母

故不曰薨不稱夫人故

不言葬不書姓為公故曰君氏

隱見為君故特書于經曰君氏

公羊傳

尹氏者何天子之大夫也其稱尹氏何貶曷為

貶譏世卿世卿非禮也外大夫不卒此何以卒天王

崩諸侯之主也

尹氏主殯贊諸侯

穀梁傳

尹氏者何也天子之大夫也外大夫不卒此何

以卒之也于天子之崩為魯主故隱而卒之

隱猶痛也周禮

大行人之職曰若有大喪則詔相諸侯之禮尹氏時在職而詔魯人之弔者

尹氏王朝世卿書卒來赴也古者論功命爵辨材

授職世祿而不世官故俊傑皆得在位威福不至  
下移尹氏秉鈞為周階亂見於家父所刺考之左  
氏傳世執王朝之政春秋於其告喪與立子朝以  
子朝奔楚皆以氏書以著世卿之失為後世戒武  
氏仍叔之子皆此義也且王臣不得外交其死也  
亦不得赴告尹氏卒而來赴於魯越禮踰法書之  
以明人臣之義杜朋黨之原又聖人之微旨也

附錄  
左傳

鄭武公莊公為平王卿士王貳于虢

西虢公亦  
仕王朝王



欲分鄭伯怨王王曰無之故周鄭交質王子狐為質

于鄭

狐平王子

鄭公子忽為質于周

忽莊公子

王崩周人將畀

虢公政四月鄭祭足帥師取溫之麥

祭足即祭仲也溫周畿內邑今

河南溫縣有古溫城

秋又取成周之禾

成周洛邑也今河南洛陽縣有故城

周鄭

交惡君子曰信不由中質無益也明恕而行要之以

禮雖無有質誰能間之苟有明信澗谿沼沚之毛

山夾

水為澗山瀆無所通為谿沼池也沚小渚也毛草也

蘋蘩藇藻之菜

蘋大萍也蘩皤蒿藇

藻聚藻也筐筥錡釜之器

方曰筐圓曰筥有足曰錡無足曰釜筐筥皆竹器錡釜皆金器

潢汙行潦之水

潢汙停水行潦流水

可薦于鬼神可羞於王公

羞進也

而况君子結二國之信

通言盟約彼此之情故云二國

行之以

禮又焉用質風有采蘩采蘋

義取不嫌薄物

雅有行葦洞酌

行葦義取忠厚洞酌義取行潦可供祭祀

昭忠信也

秋武氏子來求賻

此書來求之始

左傳武氏子來求賻王未葬也

公羊傳

武氏子者何天子之大夫也其稱武氏子何譏

何譏爾父卒子未命也

武氏子父新死未命而便為大夫薄父子之恩故稱氏言

子之以何以不稱使當喪未君也

當喪謂天子也未君者喪未三年未可居

君位稱使

武氏子來求賻何以書譏何譏爾喪事無求求

賻非禮也蓋通于下

禮記少儀臣為君喪納貨貝於君則曰納甸於有司臣歸之禮

也君求之非禮也不獨天子為然

穀梁傳

武氏子者何也天子之大夫也天子之大夫其

稱武氏子何也未畢喪孤未爵未爵使之非正也其

不言使何也無君也

桓王在喪未即位故曰無君

歸死者曰賁歸

生者曰賻曰歸之者正也求之者非正也周雖不求

魯不可以不歸魯雖不歸周不可以求之求之為言  
得不得未可知之辭也交譏之

武氏子天子大夫之嗣也不稱使者嗣王當喪未  
得發命也古者諒陰百官總已以聽於冢宰三年  
當是時而有所使稱王則同於至尊稱冢宰則疑  
於無王故不稱使所以謹通喪之禮又以示君臣  
名分之際如此其謹嚴也尺土一毛皆天子所有  
君取於臣豈得言求魯不歸賻而周求之周之失

道魯之不臣皆可見矣武氏子仍叔之子或言之  
或不言之何也蓋言武氏之子則似武氏之子自  
來求賻若仍叔之子不言之又不見其父尚存聖  
人之文所以如化工之賦物也

八月庚辰宋公和卒

左傳

宋穆公疾召大司馬孔父而屬殤公焉曰先君舍

與夷而立寡人

孔父嘉孔子六世祖先君穆公兄宣公也與夷宣公子即殤公

寡人

弗敢忘若以大夫之靈得保首領以沒先君若問與

夷其將何辭以對請子奉之以主社稷寡人雖死亦  
無悔焉對曰羣臣願奉馮也馮穆公公曰不可先君

以寡人為賢使主社稷若棄德不讓是廢先君之舉

也豈曰能賢光昭先君之令德可不務乎吾子其無

廢先君之功使公子馮出居于鄭辟殤公也八月庚辰宋

穆公卒殤公即位君子曰宋宣公可謂知人矣立穆

公其子饗之命以義夫命出于義商頌曰殷受命咸宜百

祿是荷其是之謂乎詩頌言殷湯武丁受命皆以義故任荷天之百祿宣公能使其

子任荷天祿合  
此詩之義也

穀梁  
傳 諸侯曰卒正也

外諸侯卒來告則書魯君書薨臣子之辭也外諸  
侯書卒非吾君也或不書名不知其名也左傳同  
盟則赴以名非也豈有臣子當創鉅痛深之日而  
稱先君之名以告隣國者乎且考之禮辭曰寡君  
不祿則無稱名之義審矣趙氏匡謂或同會盟而  
名見於載書或通朝聘而名見于簡牘故國史按

舊簡書而紀其名然晉獻公惠公與魯未同會盟  
通聘問而卒書名宿男同盟滕子杞子來朝而卒  
不書名則義無處也孫氏覺謂即位之初以名赴  
我亦無所據蓋承舊史之文而不可損益耳

冬十有二月齊侯鄭伯盟于石門

此書外諸侯特相盟之始齊今山東臨淄

縣西北營丘城石門杜注齊地或曰濟北盧縣故城西南濟水之門

左傳冬齊鄭盟于石門尋盧之盟也

盧杜注齊地濟北盧縣故城在今山

東長清縣西南境盧盟在春秋前

庚戌鄭伯之車僨于濟

僨仆也濟水名既盟



而過大風傳紀異也  
十二月無庚戌日誤

周室既微霸業未起諸侯無所統各相為黨宋魯  
陳蔡衛為一黨齊鄭為一黨石門之盟齊鄭相結  
也是盟也魯公不與經何以書蓋以為常事則不  
必書以為非常之事則不可以不書記曰有虞氏  
未施信於民而民信夏后氏未施敬於民而民敬  
殷人作誓而民始畔周人作會而民始疑傳曰誥  
誓不及五帝盟詛不及三王聖人有志于大道為

公之世故凡盟不削乃以是為非常而志之也

癸未葬宋穆公

穆公羊穀梁作繆

公羊傳葬者曷為或日或不日不及時而日渴葬也

及不

時不及五月也渴喻急也不及時而不日慢葬也

慢薄不能以禮葬

過時

而日隱之也

隱痛賢君不得以時葬也

過時而不日謂之不能葬

也

解緩不能以時葬

當時而不日正也當時而日危不得葬

也此當時何危爾宣公謂繆公曰以吾愛與夷則不

若愛女以為社稷宗廟主則與夷不若女盍終為君

矣宣公死繆公立繆公逐其二子莊公馮與左師勃

左師官勃名也

曰爾為吾子生母相見死母相哭所以遠絕之與

夷復曰先君之所為不與臣國而納國乎君者以君  
可以為社稷宗廟主也今君逐君之二子而將致國  
乎與夷此非先君之意也且使子而可逐則先君其  
逐臣矣繆公曰先君之不爾逐可知矣吾立乎此攝  
也終致國乎與夷莊公馮弑與夷故君子大居正宋  
之禍宣公為之也

穀梁傳 曰葬故也危不得葬也

外諸侯之葬有書有不書所以紀邦交之厚薄也  
蓋據魯人會葬以為言故不曰宋葬穆公而曰葬  
宋穆公其卒見於經而不書葬者彼雖來赴而魯  
不往會也凡此皆舊史之文也其變例有三一曰  
賊不討不書葬隱公之薨而不葬所以責臣子之  
不能討賊也宋殤齊昭之不書葬視此矣一則諱  
其辱晉景公之喪成公往弔晉人止公送葬諸侯

莫在魯人辱之故諱而不書一曰避其號吳楚之  
君書卒者十襄公如楚嘗親送其葬於西門之外  
矣其餘必多遣使會葬而無一見於經蓋據屬詞  
常法當書葬楚某王葬吳某王故削而不書也示  
討賊之義避僭王之名乃聖人之特筆而諱晉之  
辱或亦因魯史之舊文與

附錄  
左傳

衛莊公娶于齊東宮得臣之妹曰莊姜

得臣齊  
大子名

美而無子衛人所為賦碩人也又娶于陳曰厲嬀

陳國

今河南陳州是也

生孝伯早死其娣戴嬀生桓公莊姜以為

己子

厲戴皆諡嬀陳姓也桓公名完

公子州吁嬖人之子也

賤而得幸曰嬖

有寵而好兵公弗禁莊姜惡之石碻諫曰

石碻衛大夫

臣

聞愛子教之以義方弗納于邪驕奢淫佚所自邪也

四者之來寵祿過也將立州吁乃定之矣若猶未也

階之為禍夫寵而不驕驕而能降降而不憾憾而能

矜者鮮矣

降謂強降其心矜重也謂自重其身也

且夫賤妨貴少陵長

遠閒親新聞舊小加大淫破義所謂六逆也君義臣

行父慈子孝兄愛弟敬所謂六順也去順效逆所以  
速禍也君人者將禍是務去而速之無乃不可乎弗  
聽其子厚與州吁游厚石碛子禁之不可桓公立乃老致  
仕也四年經書州吁弑其君故傳先經以始事

四年春王二月莒人伐杞取牟婁

此書伐國取邑之始杞杜注本都雍丘遷

都淳于雍丘今河南杞縣淳于今山東安丘縣有故城牟婁杜注杞邑今諸城縣有婁鄉城

公羊傳牟婁者何杞之邑也外取邑不書此何以書疾

始取邑也

凡外小惡不書取邑差為重故先治之

穀梁傳

傳曰言伐言取所惡也

稱傳曰者穀梁子不親受于師而聞之于傳者

既伐其國又取其土明伐不以罪而貪其利故兩書取伐以彰其惡

諸侯相伐取地于

是始故謹而志之也

取者收奪之名諸侯土地受之天王傳之先祖彊者不得并兼弱者不宜失守也莒人聲罪伐人而彊奪其土故特書曰取以著其惡然隱桓以後傳言外取地甚衆而無一見於經何也入春秋之始猶以取邑為重中葉以後疆場之邑爭奪滋多一



彼一此失得無常有不可勝書者矣僖公取濟西  
田成公取汶陽田乃復吾故田而亦書取何也不  
請於天王以正疆理而擅兵爭奪與取非所有者  
何以異乎前書莒人入向天討不加至是伐杞取  
邑為暴益甚春秋於此蓋深惜九伐不行而憑弱  
犯寡之肆行無忌云

戊申衛州吁弑其君完

州穀梁作祝  
此書弑之始

左傳四年春衛州吁弑桓公而立

公羊傳 曷為以國氏當國也

穀梁傳

大夫弑其君以國氏者嫌也弑而代之也

竊據君位

故曰嫌

州吁衛公子程子謂春秋之初弑君者多不稱公子公孫蓋身為大惡自絕於先君也大義既明於初其後則皆以其屬稱或見其以親而寵任太過或見其以天屬而反為賊亂立義各不同也孔氏穎達則謂自莊公以上諸弑君者皆不書氏閔公

以下皆書氏乃時史有異同非仲尼所筆削理亦  
可通竝存以俟參考

夏公及宋公遇于清

此書遇之始清杜注衛邑濟北東阿縣有清亭今東阿縣屬山東兗

州府

左傳

公與宋公為會將尋宿之盟

宿盟在元年

未及期衛人

來告亂夏公及宋公遇于清

公羊傳

遇者何不期也一君出一君要之也

言及公要之也

穀梁傳

及者內為志焉爾遇者志相得也

不期而會曰遇今曰內為

志非不  
期也

不期而會曰遇清衛邑也古者諸侯或因朝覲或  
從王事無期約而適值於途必有兩君相見之儀  
近者為主遠者為賓稱先君以相接所以崇禮讓  
而絕慢易也周衰諸侯放恣非朝非會私為之約  
各簡其禮如道路相值者然異於古之不期而遇  
矣魯宋將尋宿之盟以衛來告亂而相見於清謂  
之不期而會可乎春秋志內之遇四竝書及若曰

以此及彼然也志外之遇三竝以爵若曰以尊及卑然也皆莫適為主之辭而其出不以事接不以禮之罪具見矣

宋公陳侯蔡人衛人伐鄭

此書諸侯會伐之始亦東諸侯分黨之始蔡今河南上蔡

縣縣西南有故城

左傳宋殤公之即位也公子馮出奔鄭鄭人欲納之及

衛州吁立將修先君之怨于鄭謂二年鄭人伐衛之怨而求寵

于諸侯以和其民諸篡立者諸侯既與之會則不復討故求此寵使告于宋

曰君若伐鄭以除君害

謂公子馮

君為主敝邑以賦與陳

蔡從則衛國之願也宋人許之于是陳蔡方睦於衛

故宋公陳侯蔡人衛人伐鄭圍其東門五日而還公

問于衆仲曰

衆仲魯臣

衛州吁其成乎對曰臣聞以德和

民不聞以亂以亂猶治絲而棼之也

棼亂也

夫州吁阻

兵而安忍

阻恃也

阻兵無衆安忍無親衆畔親離難以

濟矣

恃兵則民殘民殘則衆叛安忍則刑過刑過則親離

夫兵猶火也弗戢將

自焚也夫州吁弑其君而虐用其民于是乎不務令

德而欲以亂成必不免矣

州吁弑君自立欲藉諸侯之寵以和其民因揣宋  
殤之忌公子馮為伐鄭之說以動宋而已亦託修  
先君廩延之怨構成兵端則首謀者衛也而春秋  
以宋主兵此聖人誅亂賊必治其黨與之法也宋  
為大國於衛鄰近州吁弑逆義所當誅宋既不能  
申鄰國討賊之義乃反與亂賊為黨連兵伐鄭以  
遂其邪謀則人欲肆而天理滅矣故春秋以宋公

為首諸國為從所以彰大義於天下也

秋翬帥師

此書大夫會伐之始

左傳秋諸侯復伐鄭宋公使來乞師公辭之

從衆仲之言

羽

父請以師會之

羽父翬之字

公弗許固請而行故書曰翬

帥師疾之也

公羊傳

翬者何公子翬也何以不稱公子貶曷為貶與

弑公也其與弑公奈何公子翬諂乎隱公謂隱公曰  
百姓安子諸侯悅子盍終為君矣隱公曰否吾使修



塗裘吾將老焉

塗裘邑名

公子翬恐若其言聞乎桓于是

謂桓曰吾為子口隱矣

口以口語相發動也

隱曰吾不反也

稱諡

傳者所加

桓曰然則奈何曰請作難弑隱公于鍾巫之祭

焉弑隱公也

穀梁傳

翬者何也公子翬也其不稱公子何也貶之也

外大夫貶皆稱人內大夫貶皆去族稱名

何為貶之也與于弑公故貶也

天下惟大權最不可假人而兵權尤甚凡亂賊之欲動於惡未有不專主兵權者人主誠能辨之於

早逆折其心則弑逆之萌杜矣宋殤連諸侯以伐鄭使來乞師隱公辭而弗許而翬乘此以竊兵權固請而行翬於是時已有無君之心故先儒以為鍾巫之禍自帥師會伐始也

會宋公陳侯蔡人衛人伐鄭

左傳諸侯之師敗鄭徒兵取其禾而還

時鄭不車戰

前書宋公陳侯蔡人衛人伐鄭此但言翬帥師會伐鄭於文義甚為簡明而再序四國何也言之重

詞之復其中必有大美惡焉州吁弑君人倫大變  
宋及陳蔡黨惡構禍以反天常輦又往會使亂臣  
賊子之勢益張此世變之極也聖人重言以著其  
惡而未幾魯宋胥構篡弑之禍豈非蔑義亂倫氣  
類實相為感召哉

九月衛人殺州吁于濮

濮杜注陳地水名

左傳州吁未能和其民厚問定君子石子

石子石碣也

石子

曰王覲為可曰何以得覲曰陳桓公方有寵于王

桓公

稱謚左  
氏追書

陳衛方睦若朝陳使請必可得也厚從州吁

如陳石碣使告于陳曰衛國褊小老夫耄矣無能為

也此二人者實弑寡君敢即圖之陳人執之而請泣

于衛

請衛人自  
臨討之

九月衛人使右宰醜泣殺州吁于濮

右宰官名  
醜衛臣名

石碣使其宰孺羊肩涖殺石厚于陳

宰石  
碣家

臣也孺羊肩  
宰之姓名

君子曰石碣純臣也惡州吁而厚與焉

大義滅親

語古其是之謂乎

公羊  
傳

其稱人何討賊之辭也

人人得  
而討之

穀梁

傳稱人以殺殺有罪也祝吁之挈失嫌也

衆所不與故直

挈其名而道之  
無據位之嫌

其月謹之也于濮者譏失賊也

譏其不即

討

州吁之殺石碯主之而書衛人者弑君之賊人人  
得而誅之不必士師所以廣忠孝之路也若書石  
碯則似一人之私討而不見其從衆望誅有罪矣  
濮陳地據左氏陳人與有力焉而不以討賊之義  
予之者州吁阻兵乘權衛之臣子力不能誅至於

失賊之久實因四國連兵欲定其位耳故聖人以  
討賊與衛人以失賊罪諸侯程子謂春秋為爰書  
觀此類可以得其義例矣

冬十有二月衛人立晉

左衛人逆公子晉于邢

邢國名姬姓侯爵杜注在廣平襄國縣今直隸邢臺縣有

襄國故城冬十二月宣公即位書曰衛人立晉衆也

公羊傳

晉者何公子晉也立者何立者不宜立也其稱  
人何衆立之之辭也然則孰立之石碯立之石碯立

之則其稱人何

與尹氏立王子朝不稱人異詞故設問

衆之所欲立也

衆雖欲立之其立之非也

穀梁傳

衛人者衆辭也立者不宜立者也晉之名惡也

惡謂不正

其稱人以立之何也得衆也得衆則是賢也賢

則其曰不宜立何也春秋之義諸侯與正而不與賢

也

正謂嫡長

人者衆辭立者不宜立也晉乃桓公之弟莊公之子以次當立國人所共推戴而謂其不宜立者衛

之臣子可以討賊不可以置君晉雖諸侯之子而  
內不承國於先君上不請命於天子衆謂宜立而  
遂自立焉可乎故春秋於衛人特書立晉以著擅  
置其君之罪於晉去其公子以明不請王命之非  
而父子君臣之道正矣然曰衛人立晉則一國之  
公也與書尹氏立朝為一族之私者異矣此聖人  
之權衡所以不爽於毫末也



日講春秋解義卷二

欽定四庫全書薈要卷一千七百二十八

經部

日講春秋解義卷三

隱公

五年春公觀魚于棠

觀左作矢棠今山東魚臺縣魚亭山是其處

左傳五年春公將如棠觀魚者魚捕魚也魚者猶言獵者臧僖伯諫

曰臧僖伯公子凡物不足以講大事大事祀與戎其材不

足以備器用材謂皮革齒牙骨角毛羽器用軍國之器則君不舉焉君將

納民于軌物者也故講事以度軌量謂之軌取材以

章物采謂之物不軌不物謂之亂政亂政亟行所以

敗也故春蒐夏苗秋獮冬狩

蒐索也擇取不孕者苗為苗除害也獮殺也以

殺為名順秋氣也狩圍守也冬物畢成獲則取之無所擇也

皆于農隙以講事也

三年而治兵入而振旅

雖四時講武猶復三年大習振整也

歸而飲至

以數軍實

數車徒器械及所獲也

昭文章

車服旌旗

明貴賤辨等列

順少長

出則少者在前還則在後所謂順也

習威儀也鳥獸之肉不登

于俎

俎祭宗廟器

皮革齒牙骨角毛羽不登于器

以飾法度之器

則公不射古之制也若夫山林川澤之實器用之資

阜隸之事

士臣阜阜臣與與臣隸

官司之守非君所及也公曰

吾將畧地焉

畧總攝巡行之名言欲案行邊竟

遂往陳魚而觀之

陳設

也謂大設捕魚之備而觀之

僖伯稱疾不從書曰公矢魚于棠

亦失

陳也非禮也且言遠地也

棠實他竟故曰遠地

公羊傳何以書譏何譏爾遠也公曷為遠而觀魚登來

之也

齊人語也齊人名求得為得來作登來者由口授也

百金之魚公張之

張謂

張罔罟正以價值登來之者何美大之之辭也棠者

何濟上之邑也

穀梁傳

傳曰常事曰視

視朔之類

非常曰觀

觀魚之類

禮尊不親

小事卑不尸大功

尸主

魚卑者之事也

周禮獻人中士下士

公觀

之非正也

君舉必書故諸侯非朝覲會同省耕省斂不得輕  
出隱公慢棄國政遠事逸遊託畧地之說拒諫飾  
非故特書其事以志非禮

附錄左傳

曲沃莊伯以鄭人邠人伐翼

曲沃晉別封成師之邑今山西聞喜

縣莊伯成師子翼晉舊都今山西翼城縣

王使尹氏武氏助之

尹氏武氏皆周世族

大翼侯奔隨隨杜注晉地今山西介休縣東有古隨城晉內相攻伐不告亂故不書傳具其

事為後晉  
事張本

# 夏四月葬衛桓公

左傳夏葬衛桓公衛亂是以緩有州吁之亂十四月乃葬明其非慢

殺梁月葬故也

衛桓公被弒至是閱十四月而後得葬魯往會之故書弒逆人道之大變送終臣子之大事君弒而臣子能討賊以葬其君然後送終之道盡故春秋

於見弑之君必賊既討而後書葬也諡者行之迹也衛侯見弑而諡以桓名實乖矣周制五等諸侯禮辭皆稱公又有公食大夫禮葬以鄰國會之為義故從周之文而不革也

附錄 四月鄭人侵衛牧 牧衛邑今河南汲縣地

以報東門之役

東門後在四年

衛人以燕師伐鄭

燕南燕國姞姓伯爵今河南汲縣西有古東燕城

鄭

祭足原繁洩駕以三軍軍其前使曼伯與子元潛軍

軍其後燕人畏鄭三軍而不虞制人

制北制鄭邑

六月鄭

二公子以制人敗燕師于北制

二公子曼伯子元也

君子曰不

備不虞不可以師

曲沃叛王秋王命虢公伐曲沃

而立哀侯于翼

翼侯子光

秋衛師入邲

邲公羊作盛國名姬姓伯爵今山東寧陽縣北有盛鄉城

左傳衛之亂也邲人侵衛故衛師入邲

公羊傳

曷為或言率師或不言率師將尊師衆稱其率

師

將尊謂大夫師衆者滿二千五百人以上

將尊師少稱將

師少者不滿二千五百人

將卑師衆稱師

將卑謂士

將卑師少稱人君將不言率師



書其重者也

穀梁傳

入者內弗受也邾國也將卑師衆曰師

衛與邾皆文之昭也邾乘亂侵衛固為非禮衛宣  
繼州吁暴亂之後當懲艾修德以固邦本以恤民  
力乃輕動大衆以入同姓之國故書衛師入邾譏  
其用衆而逞暴也

九月考仲子之宮

公羊傳

考宮者何考猶入室也始祭仲子也

考成也成仲子之宮

廟而祭之猶生人入  
宮室必有飲食之事  
桓未君則曷為祭仲子隱為桓

立故為桓祭其母也然則何言爾成公意也

穀梁傳

考者何也考者成之也成之為夫人也

立其廟世祭之

成夫人之禮

禮庶子為君為其母築宮使公子主其祭也

公當奉宗廟故不得自主別廟之祭公子者長子之弟又妾之子

于子祭于孫止仲

子者惠公之母隱孫而修之非隱也

非責也

仲子者惠公之妾桓公之母宮始成而祭之曰考

禮諸侯無二嫡庶子既立為君則為其母別立宮

以祀之其祭也以公子主之君不親祭尊宗廟也  
桓未為君何以為其母立廟隱將舉國而讓之也  
經於來賄考宮皆書仲子而其不得為嫡明矣隱  
公攝讓之實辨矣桓公篡弑之罪昭矣凡宮廟之  
立非失禮不書此著其不宜立也不書立宮而書  
考宮蓋連下初獻六羽以為義

初獻六羽

左傳

九月考仲子之宮將萬焉

萬舞也

公問羽數于眾仲

對曰天子用八

八八六十四人

諸侯用六

六六三十六人

大夫四

四四

十六人

士二

二二四人有功賜用樂

夫舞所以節八音而行八風

八音金石絲竹匏土革木八風八方之風為調風明庶風清明風景風涼風閭闔風不周風廣莫風節者使音聲有作止之序故自八以下

惟天子得盡物數故以八為列諸侯

則不敢用八

公從之于是初獻六羽始用六佾也

公羊傳

初者何始也六羽者何舞也初獻六羽何以書

譏何譏爾譏始僭諸公也六羽之為僭奈何天子八

佾諸公六諸侯四諸公者何諸侯者何天子三公稱

公王者之後稱公其餘大國稱侯小國稱伯子男天子三公者何天子之相也天子之相則何以三自陝而東者周公主之自陝而西者召公主之一相處乎內始僭諸公昉于此乎前此矣前此則曷為始乎此僭諸公猶可言也僭天子不可言也

穀梁傳

初始也穀梁子曰舞夏

夏大也

天子八佾諸公六

佾諸侯四佾初獻六羽始僭樂矣尸子曰舞夏自天

子至諸侯皆用八佾初獻六羽始厲樂矣

言時諸侯皆僭用八

佾魯于是能自減厲而始用六穀

梁子言其始僭尸子言其始降

舊說成王特賜周公以天子之禮樂故魯得以八佾祀周公然猶止於周公之廟耳至其後羣公皆僭用焉仲子以別宮故不敢上同羣廟而用六羽書初獻者明前此用八之僭也不謂之佾而曰羽者佾乃干羽之總稱羽以象文德干以象武功婦人無武事則獨奏文樂故謂之羽而不曰佾也春秋於魯之郊禘皆因事而書以志其僭故僭用八

佾亦因考仲子之宮而書初獻以明之若仲子之  
不宜別宮獻羽則不待貶而自見矣

# 邾人鄭人伐宋

左傳宋人取邾田邾人告于鄭曰請君釋憾于宋敝邑

為道

釋四年再見伐之憾

鄭人以王師會之

鄭莊為王卿士故得用王師不書不

以告也

伐宋入其郛以報東門之役

東門役在四年

宋人使來

告命公聞其入郛也將救之問于使者曰師何及對  
曰未及國公怒乃止

怒其詭辭

辭使者曰君命寡人同恤

社稷之難今問諸使者曰師未及國非寡人之所敢

知也

為七年公  
伐邾傳

邾構鄭以伐宋則主兵者邾也故序鄭上凡班序  
上下以國之大小從禮之常也而會盟侵伐以主  
者先因事之變也故僖二十七年楚人陳侯蔡侯  
鄭伯許男圍宋大夫主兵亦序於諸侯之上所以  
著事端所由起以別其善惡之所歸也

螟

此書蟲  
災之始



公羊

傳

何以書記災也

穀梁

傳

蟲災也甚則月不甚則時

蟲食苗心曰螟言其害在內冥冥難知也稼穡為民生首務螟之害稼國之災也春秋於災異必書示人君當恐懼修省以謹天戒恤民隱也

冬十有二月辛巳公子彊卒

左傳

冬十二月辛巳臧僖伯卒公曰叔父有憾于寡人

恨諫觀  
魚不聽

寡人弗敢忘葬之加一等

穀梁傳

隱不爵命大夫

隱居攝故不爵命大夫

其曰公子彊何也

先君之大夫也

公子不為大夫則不稱公子

彊稱公子以公葬之有加禮也觀魚之諫公雖不聽而猶不忘其忠死而加禮於義為得然知其忠而不納其言則與郭公之善善而不能用等耳

宋人伐鄭圍長葛

此書圍之始長葛杜注鄭邑今河南長葛縣有故城

左傳

宋人伐鄭圍長葛以報入郕之役也

公羊傳

邑不言圍

據伐於餘丘不言圍

此其言圍何彊也

惡其彊而無義

必欲得邑

穀梁傳

伐國不言圍邑此其言圍何也久之也

以此冬圍之至

六年冬乃取之也

伐不踰時戰不逐奔誅不填服

填服

苞人民

毆牛馬曰侵

苞制也

斬樹木壞宮室曰伐

環而攻之曰圍以此年之冬圍至六年之冬而後取之直書而惡自見矣外伐國圍邑四自僖公後無復見於經者春秋之初猶以圍邑為重也兵爭日多疆場之邑一彼一此攻奪無常則不復赴告

於鄰國矣

六年春鄭人來輸平

輸左作渝

左傳六年春鄭人來渝平更成也

渝變也公之為公子戰于狐壤為鄭所執

逃歸怨鄭鄭伐宋公欲救宋宋使者失辭公怒而止怨宋則欲厚鄭鄭因此而來故經曰渝平傳曰更成

公羊傳輸平者何輸平猶墮成也何言乎墮成敗其成

也曰吾成敗矣

吾魯也

吾與鄭人未有成也吾與鄭人

則曷為未有成狐壤之戰隱公獲焉然則何以不言

戰諱獲也

君獲不言師敗績故以輸平諱也

穀梁傳

輸者墮也平之為言以道成也來輸平者不果

成也

春秋前魯與鄭平四年翬與宋伐鄭故來絕魯壞前平也

平者兩國昔有怨忿解釋而使之平也輸謂輸寫其情鄭何為輸情而求平於魯以利相結而離魯宋之黨也據左氏公之未立與鄭人戰于狐壤止為元年與宋盟于宿四年遇于清其秋會師伐鄭即魯宋為黨而與鄭有怨明矣五年鄭人伐宋宋來告命使者失辭公怒不救鄭人知其間可乘故

來輸平而自是魯遂合於鄭也何以知其以利相  
結也後此鄭來歸祊而公遂會鄭伐宋取郕及防  
皆歸於我則其輸平乃以利相結可知矣公穀以  
輸平為墮成非也前此魯鄭未嘗結好不宜言墮  
左氏作渝謂變前惡而為和好以前年翬會伐鄭  
證之於情事為合故胡氏安國用左氏之義而不  
從其文主公穀作輸而易其詁曰納也

附錄  
左傳

翼九宗五正頃父之子嘉父逆晉侯于隨

唐叔  
始封

受懷姓九宗職官五正九宗一姓為九族也五正五官之長頃父之子嘉父晉大夫新為大夫未甚著見故繫之

于父

納諸鄂晉人謂之鄂侯

鄂晉別邑在今山西鄉寧縣南

夏五月辛酉公會齊侯盟于艾

此書齊魯交好之始艾山名在今山東蒙陰縣

西北

左傳

夏盟于艾始平于齊也

春秋前魯與齊不平今乃結好故言始平于齊

宋殤既合五國之師以伐鄭又環其邑而圍之鄭之怨宋深矣去年與邾伐宋未足以釋憾故特平齊魯為他日伐宋之謀魯與齊盟而曰鄭莊合齊

魯者以三年齊鄭盟石門知齊鄭合黨故也盟不  
書及而書會則非魯志而齊欲為盟也春秋通例  
凡書盟者惡之而況於植黨行私乎

附錄  
左傳

五月庚申鄭伯侵陳大獲往歲鄭伯請成于陳

陳侯不許五父諫曰

五父陳  
公子佗

親仁善鄰國之寶也君

其許鄭陳侯曰宋衛實難鄭何能為遂不許君子曰

善不可失惡不可長其陳桓公之謂乎長惡不悛

悛止

也從自及也

從隨也

雖欲救之其將能乎商書曰惡之



易也如火之燎于原不可鄉邇其猶可撲滅周任有

言曰

周任周大夫

為國家者見惡如農夫之務去草為芟

夷蘊崇之絕其本根勿使能殖則善者信矣

芟刈也  
夷殺也

蘊積也

崇聚也

秋七月

公羊傳

此無事何以書春秋雖無事首時過則書

首始也時

四時也過厯也厯一  
時無事則書其始月

首時過則何以書春秋編年四

時具然後為年

春秋之法雖無事必書時而繫以首月四時具而後成歲也事在仲月季月則不書首月而書時以冠其月月必繫於時也

### 冬宋人取長葛

左傳 秋宋人取長葛 經書冬而傳書秋蓋秋取冬乃告也

公羊傳 外取邑不書此何以書久也 古者師出不踰時今宋更年取邑暴

師苦衆故書以疾之

穀梁傳 外取邑不志此其志何也久之也

不言鄭長葛者蒙上文伐鄭圍長葛之文也以鄭  
莊之雄黠非不能保長葛而委之於宋蓋方連結  
齊魯為後日報復之計也宋殤役衆經年肆行貪  
暴而忌鄭之深寔由公子馮之在鄭也其不善之  
積已著而不可解矣

附錄  
左傳

冬京師來告饑公為之請糴于宋衛齊鄭禮也

告饑不以王命故傳  
言京師而不書于經

鄭伯如周始朝桓王也

桓王  
即位

周鄭交惡至是  
乃朝故曰始

王不禮焉周桓公言于王曰我周之

東遷晉鄭爲依

周桓公周公黑肩也食采于周故城在今陝西岐山縣南平王東徙晉文

侯鄭武公左右王室故曰晉鄭爲依

善鄭以勸來者猶懼不蔭

蔭至也

况

不禮焉鄭不來矣

爲桓五年諸侯從王伐鄭傳

七年春王三月叔姬歸于紀

穀梁傳

其不言逆何也逆之道微無足道焉爾

逆者非卿

叔姬伯姬之娣古者諸侯一娶九女嫁女之國必以姪娣從二國來媵亦以姪娣從二年伯姬歸于紀叔姬至是始歸者待年也娣歸不書而叔姬書

以其後紀亡叔姬不歸宗國而歸於鄫能全婦道  
以賢而得書故此年特書其歸將有其末必著其  
本也

滕侯卒

滕國今山東滕縣  
西南古滕城是也

左傳七年春滕侯卒不書名未同盟也凡諸侯同盟于

是稱名故薨則赴以名

盟以名告神故薨  
亦以名告同盟

告終稱嗣

也

告亡者之終  
稱嗣位之主

以繼好息民謂之禮經

公羊傳

何以不名微國也微國則其稱侯何不嫌也春

秋貴賤不嫌同號美惡不嫌同辭

穀梁傳

滕侯無名少曰世子長曰君狄道也其不正者

名也

諸侯卒書名滕侯不名程子謂史闕文也不書葬  
魯不會也古者邦交有常春秋之時則惟以彊弱  
為厚薄如晉楚之遠而魯君親奔其喪以侯其葬  
滕鄰境也宿同盟也而赴告雖及不會其葬無其  
事闕其文魯史之舊也聖人無加損焉存其卒闕

其葬而義自見矣

夏城中丘

此書土功之始中丘魯地今山東沂州東北有中丘城

左傳夏城中丘書不時也

公羊傳中丘者何內之邑也城中丘何以書以重書也

以功重

故書

穀梁傳城為保民為之也民衆城小則益城益城無極

凡城之志皆譏也

凡書城者完舊也書築者創始也春秋凡用民力

必書其所興作不時害義固為罪矣雖時且義亦  
書見勞民為重事也然僖公嘗修泮宮復閔宮矣  
非不用民力也而不書蓋復古興廢奉先育賢乃  
為國之先務雖用民力不可以已故以為常事而  
不書耳

齊侯使其弟年來聘

此書列國  
來聘之始

左

齊侯使夷仲年來聘結父之盟也

父盟在  
六年

傳

公羊

其稱弟何

諸侯之子  
稱公子

母弟稱弟母兄稱兄

謂同  
母弟



兄

穀梁傳

諸侯之尊弟兄不得以屬通

禮非始封之君則臣諸父昆弟匹敵

之稱人臣不可以敵君故不得以屬通所以別貴賤明尊君卑臣之義

其弟云者以其

来接于我舉其貴者也

弟為臣之親貴者

年者僖公母弟也其不稱公子而變文書弟者罪

僖公以母弟之故而寵愛之過也親親之道尊其

位重其祿而非賢則不及以政事僖公私於同母

寵愛異於他弟聘魯致女交政鄰國一以委之遂

致亂嫡庶之辨以啓異日無知篡弑之階故特書  
弟以示貶著禍亂之所由始也使使致問曰聘古  
者諸侯間於天子之事乃有殷聘之禮自隱公即  
位未嘗朝周而受同列之聘是後內外交聘八十  
有七而尊王之禮罕見故悉書以示譏焉

秋公伐邾

此書伐邾之始

左傳秋宋及鄭平七月庚申盟于宿公伐邾為宋討也

為宋報入  
郕之憾

公與邾人元年盟于蔑至是而伐邾為宋討也其  
為宋討何也魯嘗拒宋而與鄭平今鄭復與宋盟  
故懼而伐邾欲以悅宋也用此見經之書伐乃紀  
其用兵之實迹以別於侵而非謂主兵者皆有言  
可執見伐者皆有罪可討至於渝蔑之盟則不待  
貶而自見矣

冬天王使凡伯來聘

此書王聘之始凡國名姬姓伯爵  
杜注汲郡共縣東南有凡城在今

河南輝  
縣西

戎伐凡伯于楚丘以歸

此書戎患之始楚丘杜注衛地今山東曹縣東楚丘亭是也

左傳初戎朝于周發幣于公卿

發陳也

凡伯弗賓

凡伯周卿士

冬王使凡伯來聘還戎伐之于楚丘以歸

傳言凡伯所以見伐

公羊傳

凡伯者何天子之大夫也此聘也其言伐之何

執之也執之則其言伐之何大之也

尊天王命責當死位故使與國

同

曷為大之不與夷狄之執中國也其地何大之也

天子大夫銜王命而被伐所在當赴其難與國君等

穀梁傳

凡伯者何也天子之大夫也國而曰伐此一人

而曰伐何也大天子之命也戎者衛也戎衛者為其  
伐天子之使貶而戎之也楚丘衛之邑也以歸猶愈

乎執也

諱執言以歸  
尊尊之正義

周禮時聘以結諸侯之好諸侯不修臣職而聘之  
非王法也國而曰伐此一人而曰伐見其以徒衆  
也楚丘衛地王使過賓戎伐之而衛不救是不臣  
也凡伯見執不能死於其位而從之歸是失身也  
王靈之不振如此此桓文之功所以不可沒與

附錄  
左傳

陳及鄭平

六年鄭侵陳  
大獲令乃平

十二月陳五父如鄭涖

盟壬申及鄭伯盟欽如忘

志不  
在欽

洩伯曰

洩伯鄭  
洩駕

五父

必不免不賴盟矣鄭良佐如陳涖盟

良佐鄭  
大夫

辛巳及

陳侯盟亦知陳之將亂也

入其國觀其政治故總言  
之也為桓五年六年陳亂

蔡人殺  
陳佗傳


鄭公子忽在王所故陳侯請妻之

以忽有  
王寵故

鄭伯許之乃成昏

為鄭忽失齊昏  
援以至出奔傳

日講春秋解義卷三



覆校官檢討臣季學錦

校對官庶吉士臣許兆椿

膳錄監生臣范櫛

膳錄監生臣魏鎔



欽定四庫全書薈要

經部

日講春秋解義卷四

詳校官原任侍講臣王燕緒

欽定四庫全書舊要卷一千七百二十九

經部

日講春秋解義卷四

隱公

八年春宋公衛侯遇于垂

垂杜注衛地濟陰句陽縣東北有垂亭今山東曹州北句

店是

其地也

左八年春齊侯將平宋衛

平宋衛于鄭

有會期宋公以幣

請于衛請先相見衛侯許之故遇于犬丘

犬丘垂也地有兩名

穀梁

不期而會曰遇遇者志相得也

按左氏齊侯將平宋衛于鄭而以經考之後此瓦屋宋齊衛參盟而鄭不與十年入鄭伐戴又宋衛為黨以仇鄭則此遇所謀蓋欲從齊而無意於釋鄭憾也三國既有會期而宋以幣請先見則非不期而遇可知矣

三月鄭伯使宛來歸祊庚寅我入祊

祊公羊穀梁作邲杜注鄭祀泰山之

邑今山東費縣治故祊城是也

左傳鄭伯請釋泰山之祀而祀周公以泰山之祊易許

田三月鄭伯使宛來歸祊不祀泰山也

許田成王賜周公朝宿之

邑後世因立周公別廟焉地近鄭祊鄭助祭泰山湯沐之邑地近魯鄭以天子不能復巡狩故欲以祊易許田各從本國所近恐魯以周公別廟為疑故云已廢泰山之祀欲為魯祀周公遜辭以求之也

公羊傳

宛者何鄭之微者也邠者何鄭湯沐之邑也天

子有事于泰山諸侯皆從泰山之下諸侯皆有湯沐

之邑焉

有事者巡狩祭天告至之禮也當沐浴潔齋以致其敬故謂之湯沐邑所以尊待諸侯而

共其費也

其言入何難也

入非已至之文難詞也

其日何難也

言不可即

入至此日乃入也

其言我何言我者非獨我也

自入邑不得言我有他人

在其中乃得言我

齊亦欲之

以齊與魯鄭比聘會知之

穀梁傳

名宛所以貶鄭伯惡與地也

去其族惡擅易天子邑

入者

內弗受也日入惡入者也邴者鄭伯所受命于天子

而祭泰山之邑

入之例見前嫌易田與兵入異故重發之

六年鄭人來輸平蓋請以祊歸也今使宛來歸祊

蓋將以易許也許者朝宿之地在王畿之內成王

所以特賜周公也祊者湯沐之邑在泰山之旁宣

王所以特賜鄭伯也祊近於魯許鄰於鄭故各以

所便相易用此見鄭有無君之心而謂天王不復  
能巡狩矣用此見鄭有無親之心而敢以先祖所  
受之邑與人矣入者不順之詞非我所有而彊入  
之也

附錄  
左傳

夏虢公忌父始作卿士于周

周人遂  
畀之政

四月甲辰鄭公子忽如陳逆婦媯辛亥以媯氏歸甲  
寅入于鄭陳鍼子送女先配而後祖鍼子曰是不為

夫婦誣其祖矣非禮也何以能育

鍼子陳大夫禮逆  
婦必先告祖廟而

後行鄭忽先逆婦而後告廟故曰先配而後祖

夏六月己亥蔡侯考父卒

穀梁傳 諸侯日卒正也

辛亥宿男卒

穀梁傳 宿微國也未能同盟故男卒也

周人以諡易名在禮赴告之詞曰寡君不祿則赴不以名明矣而卒以名書以會盟聘問素與魯通故志其人以別其世次也已通而不名者舊史失

之也宿與魯元年同盟而卒不書名則他可知矣  
蔡宣公未與魯通而卒書名蓋別有所徵凡此類  
皆舊史之文孔子不得而加損者也

秋七月庚午宋公齊侯衛侯盟于瓦屋

此書外參盟之始瓦屋杜注周

地今河南洧川縣南瓦屋里是也

左傳齊人卒平宋衛于鄭秋會于溫盟于瓦屋以釋東

門之役禮也

會溫不書不以告也鄭不與盟故不書

穀梁傳外盟不日此其日何也諸侯之參盟于是始故



謹而日之也

三人為盟  
曰參盟

誥誓不及五帝盟詛不及三

王交質子不及二伯

瓦屋之盟左氏以為齊平宋衛于鄭而程子以為  
與鄭絕者蓋宋衛雖屈於齊而終不與鄭平也入  
春秋來書盟者七皆二國相為盟自參盟作而諸  
侯各樹其黨邦交離合無常會盟侵伐益多事矣  
瓦屋周地三國會於此既不入覲於王而刑牲歃  
血私相要結其蔑視王室之罪可勝誅哉是盟也

關於世道升降之機為甚故謹之

# 八月葬蔡宣公

公羊傳

卒何以名而葬不名卒從正而葬從主人

卒名謹終

辨實之正義葬稱公從臣子之辭

卒何以日而葬不日卒赴而葬不

## 告

穀梁傳

月葬故也

蔡侯考父卒以夏六月而以八月葬盖踰月而葬矣諸侯五月而葬不及期簡也葬舉諡故不名不

日史失之

附錄左傳

八月丙戌鄭伯以齊人朝王禮也

鄭伯不以虢公得政而背

王故禮之上有七月庚午下有九月辛卯則八月不得有丙戌

九月辛卯公及莒人盟于浮來

浮公羊穀梁作包此書好莒之始亦書魯君特

會外大夫之始浮來杜注紀邑在今山東莒州西

左傳公及莒人盟于浮來以成紀好也

二年紀莒盟于密為魯故今公

尋之故曰以成紀好

公羊傳

公曷為與微者盟

稱人稱人則從不疑也

從隨也稱

微者則非公從人盟  
而人從公盟不疑矣

穀梁傳

可言公及人不可言公及大夫

言大夫則敵公矣

公曷為及莒之微者盟左氏曰成紀好也及者內  
為志凡公與彊國之大夫盟則不書公及諱彊國  
之以無道加於公也及齊高傒晉處父盟是也與  
小國之大夫盟則不諱公以公自欲與盟非為彼  
所彊也然以望國之君而降班以盟小國之大夫  
失禮亦甚矣

蟪

民以食為天有災必書重民命也

附錄  
左傳

冬齊侯使來告成三國公使衆仲對曰君釋三

國之圖以鳩其民

鳩集也

君之惠也寡君聞命矣敢不

承受君之明德

冬十有二月無駭卒

駭穀梁  
作亥

左傳

無駭卒羽父請諡與族公問族于衆仲衆仲對曰

天子建德

立有德  
為諸侯

因生以賜姓

若舜由嫡  
故陳為嫡姓

胙之土

而命之氏諸侯以字

諸侯位卑不得賜姓故其臣因氏其王父字

為諡因

以為族

或使即先人之諡稱以為族

官有世功則有官族邑亦如

之

謂取其舊官舊邑之稱以為族

公命以字為展氏

諸侯之子稱公子公子之子稱

公孫公孫之子以王父字為氏無駭公子展之孫故為展氏

公羊

此展無駭也何以不氏疾始滅也故終其身不

氏

入極為始滅故終身貶之

穀梁

無駭之名未有聞焉或曰隱不爵大夫也或說

曰故貶之也

無駭公子展之孫也何以名公孫之子未賜族而  
為大夫者則書名與異姓之臣等也蓋古者置卿  
惟賢德是選有世祿而無世官春秋之初猶為近  
古故無駭與挾皆書其名而不氏耳其後大夫世  
官無不賜之族如魯三桓鄭七穆以字族也宋戴  
氏衛齊氏以諡族也晉士氏中行氏以官族也韓  
氏魏氏以邑族也子孫相繼亦世其官而不改而  
先王之禮亡矣故其弊至於三家專魯華向亂宋

六卿分晉諸侯失國而出奔者相繼則惟其不遵  
先王世祿而不世官之禮是以至此極也觀春秋  
所書而是非之跡治亂之效昭然可覩矣

九年春天王使南季來聘

穀梁傳

南氏姓也季字也聘問也聘諸侯非正也

古者天子於諸侯有時聘閒問之典所以洽恩惠  
而通情志也載在周禮掌之行人而穀梁氏乃以  
聘諸侯為非正何也按王制諸侯之於天子比年



一小聘三年一大聘五年則躬往述職而朝爲天子念其勤故有時聘遣問以慰答之今魯隱嗣世九年史策不書遣使如周亦不書公如京師則是朝聘之典俱缺也以王法論之貶爵削地在所不免而遣使聘爲其斯以爲不正乎通經所書公如京師者一朝于王所者二卿大夫如京師者五魯於王室最親怠慢不臣如此則他國可知矣天王來聘于魯者七錫命者三歸賑者一賁葬者四恩

數稠疊若此則齊晉秦楚諸大國聘問之勤不後於魯又可知矣夫君臣上下之分恃有紀綱禮法以維之王朝無紀綱而後征伐自諸侯出諸侯蔑禮法而後政事自大夫出豈一朝一夕之故乎記曰聘覲之禮廢則君臣之位失而倍畔侵陵之敗起矣可不戒哉

三月癸酉大雨震電庚辰大雨雪

左傳

九年春王三月癸酉大雨霖以震書始也

書癸酉始雨日

庚辰大雨雪亦如之書時失也凡雨自三日以往為

霖平地尺為大雪

經有電無霖傳有霖無電傳不詳經蓋所據簡策錯誤

公羊傳何以書記異也何異爾不時也何以書記異

也何異爾俶甚也

俶始怒也甚猶太甚也

穀梁傳

震雷也電霆也

電雷之光有霆必有電故曰電霆

志疏數也

八日之間再有大變陰陽錯行故謹而日之也雨月

志正也

雨得其時則書月

陽精發而為雷電陰氣凝而為雨雪陰陽運動宜

有常而無忒周之三月寔夏之正月雷未可以出  
電未可以見而大震電此陽失其節也雷既出電  
既見則雪不當復降而大雨雪則陽不能制陰而  
陰氣縱矣凡變見於天曰異害及於民曰災春秋  
遇災異必書雖不若漢儒五行之說每事彊為徵  
應而天人相感之際實未可忽也

挾卒

挾公羊穀  
梁俱作俠

公羊傳

俠者何吾大夫之未命者也

穀梁

俠者所俠也

俠名也所其氏或云所斥也未詳孰是

弗大夫者隱

不爵大夫也隱之不爵大夫何也曰不成為君也

夏城郎

左傳

夏城郎書不時也

隱公元年費伯已帥師城郎至此年復城之蓋因其舊而加修築也案桓十年三國來戰於此莊八年侯陳蔡師次於此十年齊宋之師又次於此是郎為魯之要地非不宜城而城以夏則非其時也

城以衛民而因此以奪農時則昧於為政之本矣

秋七月

穀梁傳

無事焉何以書不遺時也

冬公會齊侯于防

防公羊作郕杜注魯地在琅瑯華縣東南今山東費縣東北有華城即華

縣

左傳

宋公不王鄭伯為王左卿士以王命討之伐宋宋

以入郕之役怨公不告命

入郕在五年

公怒絕宋使秋

鄭人以王命來告伐宋

伐宋未得志故欲再伐之

冬公會齊侯

于防謀伐宋也

穀梁傳

會者外為主爲爾

周禮大行人職時會以發四方之禁王事也至春秋諸侯或講好或謀事自相見於隙地或諸侯與鄰國之大夫相見或列國之大夫自相見竝以會名故凡書會皆譏也據左氏宋公不王鄭伯以王命討之使來告命會于防謀伐宋也于中丘爲師期也果爾則奉王命討不庭經於會防及後伐宋

宜有異文以發明其善而與私會私伐者同辭以  
是知其非王事也蓋矯假以逞私忿耳

附錄  
左傳

北戎侵鄭鄭伯禦之患戎師曰彼徒我車懼其

侵軼我也

軼突也

公子突曰

突鄭厲公也

使勇而無剛者嘗

寇而速去之

嘗試也勇則能往無剛不恥退

君為三覆以待之戎輕

而不整貪而無親勝不相讓敗不相救先者見獲必

務進進而遇覆必速奔後者不救則無繼矣乃可以

逞從之戎人之前遇覆者奔祝聃逐之

祝聃鄭大夫

衷戎



師

謂我師在三伏之中

前後擊之盡殪

殪死也

戎師大奔十一月

甲寅鄭人大敗戎師

十年春王二月公會齊侯鄭伯于中丘

左傳

十年春王正月公會齊侯鄭伯于中丘癸丑盟于

鄧為師期

傳言正月會癸丑盟推經傳日月癸丑是正月二十六日經二月誤盟不書蓋公還

告會而不告盟鄧杜注魯地當在今山東兗州府境

春秋之初諸侯擅興不過彼此修怨耳鄭伯為王

卿士無王命而會齊魯齊魯亦無王命而私與鄭

連兵自是諸侯始橫行而無所忌此禮樂征伐自諸侯出之始事也

夏翬帥師會齊人鄭人伐宋

左傳

夏五月羽父先會齊侯鄭伯伐宋

言先會明非公本期

公羊傳

此公子翬也何以不稱公子貶曷為貶隱之罪

人也故終隱之篇貶也

終隱之世皆去其族至桓而復書族明與桓同惡也

翬之悖逆其來有漸隱公不能辨之於早始焉伐鄭固請而行今茲伐宋先期而往肆行無忌不待

鍾巫之變而已知其有無君之心矣故兵柄下移春秋屢致意爲以示當制之於未亂也若夫伐宋之是非則直書其事而自見矣

六月壬戌公敗宋師于管

管杜注  
宋地

左傳六月戊申公會齊侯鄭伯于老桃

經不書會不告于廟也老桃杜

注宋地今山東濟寧州北有桃鄉城六月無戊申戊申五月二十三日日誤

壬戌公敗宋師于管

穀梁傳

內不言戰舉其大者也

戰然後敗故敗大于戰

兩軍皆陳曰戰今不言戰而言敗蓋不待陳而薄  
人於險以詐謀取勝也故以敗之者為主矯假王  
命棄好怒鄰而遂鄭報怨之私雖以正用兵猶貶  
況以詐譖取勝乎

辛未取郕辛巳取防

郕在今山東城武縣東南  
防在今山東金鄉縣西

左傳

庚午鄭師入郕辛未歸于我庚辰鄭師入防辛巳

歸于我君子謂鄭莊公于是乎可謂正矣以王命討

不庭

下之事上皆  
成禮于庭中

不貪其土以勞王爵正之體也

勞者

叙其勤以答之魯爵尊

鄭爵卑故言以勞王爵

公羊傳

取邑不日此何以日一月而再取也何言乎一

月而再取甚之也內大惡諱此其言甚之何春秋錄內而略外于外大惡書小惡不書于內大惡諱小惡

書

明取邑為小惡一月再取小惡中甚者耳故書而不諱

穀梁傳

取邑不日此其日何也不正其乘敗人而深為

利取二邑故謹而日之也

經於二邑書魯取地歸於魯也傳書鄭入而歸於

魯蓋鄭實主兵故讓魯取之也魯宋同盟未嘗有  
怨入郛不救其曲在魯乃中變而合鄭以讎宋實  
由輸平歸祊以利相結故既勝之後復以二邑讓  
魯直書其事而背義尚詐結黨肆暴之惡具見矣

附錄  
左傳

蔡人衛人邾人不曾王命

不伐  
宋也

秋宋人衛人入鄭

齊魯地遠宋量力不能報故先結衛以報鄭鄭方  
息師於郊不暇守禦故入之易諸侯不務講信修

睦而結黨報復反覆相攻皆由王政不綱是以肆行而無所忌也

宋人蔡人衛人伐戴鄭伯伐取之

戴公羊穀梁作戴戴國子姓杜注陳畱外

黃縣東南有戴城今河南考城縣東南考城故城是也

左傳秋七月庚寅鄭師入郊猶在郊

駐兵遠郊誘三國散其師因而取之

宋人衛人入鄭蔡人從之伐戴八月壬戌鄭伯圍戴

癸亥克之取三師焉宋衛既入鄭而以伐戴召蔡人

蔡人怒故不和而敗

公羊傳

其言伐取之何易也其易奈何因其力也因誰

之力因宋人蔡人衛人之力也

穀梁傳

不正其因人之力而易取之故主其事也

戴居鄭之北鄙三國入鄭而不能克故移兵以伐其附庸鄭伯乘其敝與戴合攻而取三師其殘民甚矣

附錄左傳

九月戊寅鄭伯入宋

報入鄭也九月無戊寅戊寅八月二十四日

冬十月壬午齊人鄭人入郕

郕公羊作盛



左傳冬齊人入郕討違王命也

穀梁傳入者內弗受也日入惡入者也郕國也

二國入郕以郕不會伐宋也宋以公子馮在鄭故  
二國交惡左氏傳云宋公不王鄭伯以王命討之  
據經所書不見其為王討也王臣不行王師不出  
矯假以逞私忿耳蓋齊所欲者郕也鄭所欲者許  
也鄭助齊以入郕故明年秋齊復助鄭以入許猶  
私結黨馮弱暴寡其惡極矣按傳隱三年周人將

畀號公政與鄭交惡六年鄭伯朝周王不禮焉八年號公作卿士于周是年鄭伯以齊朝王九年以王命討宋於時鄭伯為王左卿士疑因再朝王復任之而鄭之朝王陰欲假王命以撻諸侯而報私怨也觀其前則有取麥取禾之悖觀其後且為繻葛之戰矣春秋之不王孰有過於鄭莊者左氏蔽於其迹而不究其情當以程子之說正之

十有一年春滕侯薛侯來朝

此書諸侯朝魯之始薛任姓杜注魯國薛縣今薛城

在山東

滕縣南

左傳 十一年春滕侯薛侯來朝爭長薛侯曰我先封

薛祖

奚仲夏所封

滕侯曰我周之卜正也

卜正卜官之長周禮有春官太

在周之前

卜薛庶姓也

非周同姓

我不可以後之公使羽父請于薛

侯曰君與滕君辱在寡人周諺有之曰山有木工則度之賓有禮主則擇之周之宗盟異姓為後寡人若朝于薛不敢與諸任齒君若辱貺寡人則願以滕君為請薛侯許之乃長滕侯

公羊傳

其言朝何諸侯來曰朝大夫來曰聘其兼言之

何微國也

穀梁傳

天子無事諸侯相朝正也

事謂巡狩崩葬兵革之事

考禮修

德所以尊天子也諸侯來朝時正也

朝宜以時故書時則正也

植

言同時也

植言謂別言也如穀伯鄧侯來朝同時來不俱至

累數皆至也

累數

總言之也如滕薛來朝同時俱至

周禮行人職凡諸侯之邦交殷相聘世相朝也其

為禮亦節矣周衰典禮大壞邦交惟視勢之彊弱

以魯事考之或來朝而不報其禮或屢往而至於  
不納無復有以禮義相接者矣況於天子述所職  
者蓋闕如也而自相朝聘可乎故經於大國來聘  
小國來朝一切書而不削惡其慢於王事也且非  
天子不旅見諸侯滕薛二君不各書來朝而累數  
之與穀伯鄧侯之來朝異文是同日而旅見矣隱  
公偃然而受之罪可勝誅乎

夏公會鄭伯于時來

公羊穀梁夏字下有五月時來公  
羊作祁黎杜注時來邾也榮陽縣

東有瑩城鄭地在  
今河南開封府東

左傳

夏公會鄭伯于邾謀伐許也鄭伯將伐許五月甲

辰授兵于太宮

鄭祖廟

公孫閱與潁考叔爭車

公孫閱鄭大夫

潁考叔挾輶以走

輶車

子都拔棘以逐之

子都即公孫閱棘戟

也

及大逵

逵道方九軌

弗及子都怒

會者外為主此會鄭志也許遠於齊魯而鄰於鄭  
鄭莊日思兼井然不藉鄰國之勢則動非萬全故  
前年伐宋克其二邑鄭不取而讓於魯又助齊入

邾齊魯之交益固然後連兵以壓許蓋鄭計入許  
之後齊魯不能越國以鄙遠則已安坐而得之矣  
齊魯特為其所愚而不覺耳故時來之會以鄭主  
之也

秋七月壬午公及齊侯鄭伯入許

許今河南許州故城在州東北

左傳

秋七月公會齊侯鄭伯伐許庚辰傳于許

附于城下穎

考叔取鄭伯之旗蝥弧以先登

蝥弧旗名

子都自下射之

顛

顛墜而死

瑕叔盈又以蝥弧登

瑕叔盈鄭大夫

周麾而呼曰君

登矣鄭師畢登壬午遂入許許莊公奔衛齊侯以許

讓公公曰君謂許不共故從君討之許既伏其罪矣

雖君有命寡人弗敢與聞乃與鄭人鄭伯使許大夫

百里奉許叔以居許東偏

許叔許君弟東偏東鄙也

曰天禍許國

鬼神實不逞于許君而假手于我寡人寡人惟是一

二父兄不能共億

共給億安也

其敢以許自為功乎寡人

有弟不能和協而使餬其口于四方

弟謂共叔段餬也說文云寄

食其況能久有許乎吾子其奉許叔以撫柔此民也



吾將使獲也佐吾子

獲鄭大夫

若寡人得沒于地天其以

禮悔禍于許無寧茲許公復奉其社稷

無寧也

惟我鄭

國之有請謁焉如舊昏媾其能降以相從也無滋他

族實偏處此以與我鄭國爭此土也吾子孫其覆亡

之不暇而況能裡祀許乎寡人之使吾子處此不惟

許國之為亦聊以固吾圉也

國邊垂也

乃使公孫獲處許

西偏曰凡而器用財賄無寘于許我死乃亟去之吾

先君新邑于此

先君謂武公周宣王封弟友為鄭伯食采于畿內友之子武公從平王東

遷取虢鄆二國之地居之乃為新鄭

王室而既卑矣周之子孫日失其

序夫許大岳之胤也

大岳神農之後堯四岳也

天而既厭周德矣

吾其能與許爭乎君子謂鄭莊公于是乎有禮禮經

國家定社稷序民人利後嗣者也許無刑而伐之

刑法

也服而舍之度德而處之量力而行之相時而動無

累後人

死乃亟去之言欲不累後人也

可謂知禮矣

鄭伯使卒出

玃行出犬雞以詛射潁考叔者

玃猪別名百人為卒二十五人為行

君

子謂鄭莊公失政刑矣政以治民刑以正邪既無德

政又無威刑是以及邪邪而詛之將何益矣

及者內為主時來書公會鄭伯明伐許本鄭志也  
此書公及齊侯鄭伯則入許者公所欲也蓋自輸  
平而後宛來歸祊又助魯取二邑於宋故公欲助  
鄭并許以為報也隱公即位十有一年受天王之  
使而未嘗朝聘王室告喪既不奔赴且無賄賂擅  
興甲兵植黨肆暴奪人城邑今又助鄭為虐入人  
之國而逐其君其不善之積蓋有不可逭者矣

附錄  
左傳

王取鄆劉蕢邳之田于鄭

鄆杜注緱氏縣西南有鄆聚在今河南偃

師縣西南劉杜注緱氏縣西北有劉亭今亦屬偃師縣蕢在今河南懷慶偃師孟縣之間邳今河南河內

縣西北邳

而與鄭人蘇忿生之田

蘇忿生周武王司寇蘇公也

溫

注見

原

杜注在沁水縣西今河南北有原鄉

絺

杜注在野王今河內縣西南有絺城

樊

杜注一名陽樊野王縣西南有陽城在今濟源縣東南

隰郛

杜注在懷縣西南今河南武陟

縣西南隰城是也

欒茅

杜注在修武縣北今河南向縣西有修武縣北大陸村即其地

向

杜注軹

地名向今濟源縣西南有向城

盟

杜注盟津在今孟縣南

州

杜注州縣今故城在河內縣治

東

陘

杜注關元和志太行陘在河內縣西北三十里在今懷慶府西北一名丹陘

隤

杜注修

武縣北京相璠曰河內

懷

杜注懷縣今武陟縣西有懷縣故城十二邑皆蘇忿

生之

田 君子是以知桓王之失鄭也怒而行之德之則

也禮之經也已弗能有而以與人人之不至不亦宜

乎

蘇氏叛王十二邑王所不能  
有為桓五年從王伐鄭張本

鄭息有違言

息國  
名姬

姓侯爵今河南息縣  
違言以言語相違恨

息侯伐鄭鄭伯與戰于竟息師

大敗而還君子是以知息之將亡也不度德不量力

不親親

鄭息同  
姓之國

不徵辭不察有罪犯五不韙而以伐

人

韙是  
也

其喪師也不亦宜乎 冬十月鄭伯以號師

伐宋壬戌大敗宋師以報其入鄭也

入鄭在十年

宋不告

命故不書凡諸侯有命告則書不然則否

例因宋不告敗而發

此例

師出臧否亦如之雖及滅國滅不告敗勝不告克

不書于策

冬十有一月壬辰公薨

左傳

羽父請殺桓公將以求大宰

太宰官名

公曰為其少故

也吾將授之矣使營菟裘吾將老焉

菟裘杜注魯邑在泰山梁父縣

南今山東泰安州南泗水縣北有梁父城菟裘聚

羽父懼反譖公于桓公而

請弑之公之為公子也與鄭人戰于狐壤止焉

內諱獲故

言止狐壤鄭地後漢志潁川郡潁陰縣有狐宗鄉疑即此在今河南許州西

鄭人囚諸尹

氏

尹氏鄭大夫

賂尹氏而禱于其主鍾巫

主尹氏所主祭

遂與尹

氏歸而立其主

立鍾巫于魯

十一月公祭鍾巫齊于社圃

國名

館于寫氏

魯大夫

壬辰羽父使賊弑公于寫氏立桓

公而討寫氏有死者

欲以弑公之罪加寫氏而不能正法僅有死者而已

不書

葬不成喪也

公羊傳

何以不書葬隱之也何隱爾弑也弑則何以不

書葬春秋君弑賊不討不書葬以為無臣子也子沈

子曰

稱子冠氏上者著其為師也

君弑臣不討賊非臣也不復讎

非子也葬生者之事也春秋君弑賊不討不書葬以為不繫乎臣子也公薨何以不地不忍言也隱何以無正月隱將讓乎桓故不有其正月也

穀梁傳

公薨不地故也隱之

隱猶痛也

不忍地也其不言葬

何也君弑賊不討不書葬以罪下也隱十年無正隱不自正也元年有正所以正隱也

明隱宜立



死者人道之終也故春秋於魯君之薨路寢而外  
于小寢于別宮臺下皆明著其地至薨而不地則  
有不忍言者矣不書葬賊不討也使書公薨于寫  
氏桓輦之罪非徒不討後世且無由而識之矣不  
書地以著君父不得其死之實不書葬以警臣子  
復讎討賊之心非聖人莫能修此類是也

日講春秋解義卷四